

CORONICA 2020

La punt da Gurlaina per Hollywood

MARTIN CANTIENI

Tge far cun la punt construida dal 1905? La vischnanca da Scuol aveva previs da la sanar. Ma cura che la puntanada era gia montada, è sa mussà che la sanaziun è pli difficila che pensà: Schebain i grategia da la spendrar n'è betg cler. Per precisar: La dumonda è, sche la populaziun da Scuol vul financiar il salvament. Gia senza las cumplaziuns avess la sanaziun custà 2,2 milliuns.

Forsa vali la paina da dar in'egliada en la Pologna. Là datti in cas sumegliant: La punt da Pilchowice: construcziun da metal, averta l'onn 1905. La punt da viafier è dapi intgins onns ord funcziun pervia da mendas da vegliadetgna. La Pologna ha ussa vendì la punt a Hollywood per in film cun *Tom Cruise* (quel da Scientology) – per la sigliantar en l'aria a moda spectaculara per il film!

La populaziun dal lieu e la tgira da monuments en Pologna han fatg opposiziun cunter il project, Hollywood ha stuì ceder e la punt vegn sco ch'i para mantegnida. Critichers dal project chattan era che l'effect da reclama dal film per la Pologna fiss stà pitschen – l'istorgia dal film sa splega numnadain en Svizra! Forsa vender la punt da Gurlaina a Hollywood?

Tgè è la «C(o)ronica da l'onn 2020»? – *Jon Bischoff* (illustraziun) e *Martin Cantieni* (text) commenteschan, resumeschan e parodeschan per la FMR 12 eveniments ch'ans han occupà durant l'onn 2020. Jon Bischoff da Vicosoprano illustrescha la fin da mintga mais per la FMR il «Mais da pais». Martin Cantieni da Turitg ha tranter auter gudagnà quest onn la concorrenza litterara rumantscha «Premi Term Bel». Damai oz l'emprima «coronica» or da lur penna.

